

小
腆
紀
年

小腆紀年附攷卷第七

前翰林院檢討加詹事府贊善銜六合徐鼎

秋七月丙戌朔明祀高皇帝以下於奉先殿以崇禎帝后祔祭

明吏科給事中章正宸疏陳時事

正宸字羽侯號格菴會稽人崇禎辛未進士選庶吉士溫體仁招之不往改禮科給事中遇事敢言忤座主首輔周延儒編管均州事詳紀傳甲申三月太常吳麟徵遷掌科薦以日代命甫下而京師陷偕劉宗周號哭荷戈趣浙撫黃鳴駿發喪出師鳴駿謝之乃召募義旅將發而福王立召復故官疏言今日江左形勢視晉宋爲更難當事者泄

泄偷息處堂自娛兩月以來聞文吏錫鞶矣不聞獻獻武
臣私闕矣不聞公戰老成引遁矣不聞敵愾諸生捲堂矣
不聞請纓如此而曰興朝氣象臣雖愚知其未也今惟有
進取爲第一義進取不銳則守禦必不堅比者河北山左
忠義響應結營寨殺僞官爲朝廷効死力不及今電掣星
馳倡義申討是靡天下之氣而坐失事機也宜急檄四鎮
渡河聯絡河北山東諸路齊心協力互爲聲援使兩京路
通而後塞井陘絕孟津據武關以攻隴右恐賊不難旦夕
殄也陛下宜縞素誓師駐蹕淮上聲靈所及人切同仇虎
豹貔貅勇憤百倍今部院寺司各署不稱行在而工作煩
興議者已占陛下志圖偏安天下事變皆生意外將何以

待之宜嚴敕諸大臣速簡爾車徒某舊額某新增水幾何
陸幾何速備爾芻糗幾何本幾何折主幾費客幾費選爾
將帥某堪監肅某堪分閫審爾形勢某地建鎮某地設堡
某處理伏某處出奇修爾干戈繕爾城塹進寸則寸進尺
則尺阨險處要大勢已得天下大矣不患無人臣未見張
岳韓劉之傑不應運而出也

攷曰南畧載此爲七月初二日丁亥疏

又疏陳

鉉政一名器宜慎輦金鎖營甯免瓜李之誚一職掌宜專
用人歸吏部今有咨送者有薦舉者有徑行奏討者家臣
所執幾何一封疆宜肅不斬誤國之臣不激報國之氣一
廢官宜飭爵重則人乃勸法守則士知恩纍纍起廢不自
靜聽豈不聞律有罷吏不入國門之禁

攷曰此疏見聖安本紀附錄 既

而馬士英謀以中旨起阮大鍼先內傳張有譽爲戶部尙書正宸封還詔書以有譽雖賢而傳陞之弊必不可啓旋安遠侯柳祚昌受士英旨薦大鍼正宸又力爭且曰朝廷如此舉動邸報流傳見臣姓名尙挂仕版必相顧駭愕謂負掖垣職掌萬死何辭乞放臣歸里正宸清嚴方正爲清流所倚賴同官沈允培常言章君不特怒時可畏卽笑時亦可畏也士英輩忌之甚轉爲大理寺丞竇奪其言路也已見國事日非乞假歸

徐鼎曰戢山先生之開講也格菴首從之顧生平不甚講學曰力行不在口說也味格菴之言而當日之聚徒開講爭門戶事標榜蓋其所不屑爲矣正以律身忠孝事上

爲利疚不爲威怵古之遺直此其選歟

明建甯知縣蔣芬自請勤王

攷日甲乙史載此爲初二日丁亥事

芬捐貲造火器募勇士朱千斤劉鐵背等三請勤王其詞曰幸而迅掃狂氛社稷之福否則斷脰決腹以明國家三百年養士之報亦無負三十年讀書之心聞者壯之巡按陸清源以聞時廣西巡撫方震孺松江知府陳亨給事中李維樾與兄僉都御史李光泰先後捐餉募兵入衛而廷臣泄泄不以爲意

徐鼎曰特書何嘉之也何嘉乎爾當日之勲戚世臣封疆大吏厝火不戒處堂自嬉芬以小臣而伏闕請纓功雖無成志則可嘉矣故書之以愧當日諸臣也

戊子明追上福恭王及妃姚氏神宗妃鄭氏尊號

恭王爲貞純肅哲聖敬仁懿恭皇帝妃姚氏爲孝誠端惠
慈順貞穆皇太后神廟鄭貴妃爲孝甯溫穆莊惠慈懿憲
天裕聖太皇太后

明遙尊母妃鄒氏爲太后追號故妃黃氏李氏爲后

鄒氏本京師人爲福恭王次妃王之生母也王走衛輝與
母相失卽位後遣迎未至遙尊爲恪貞仁壽皇太后王元
妃黃氏繼妃李氏皆早逝追諡黃妃曰孝哲懿莊溫貞仁
靖皇后李妃曰孝義端仁肅明貞潔皇后明年三月童妃
獄後更上黃妃諡曰孝哀懿靖恭惠溫貞脩天協聖哲皇
后封妃戚黃九鼎爲備中伯

明追上懿文太子建文帝景泰帝諡號

追復懿文皇太子廟諡曰興宗孝康皇帝妃常氏曰孝康
皇后追上建文帝諡曰嗣天章道誠懿淵恭觀文揚武克
純篤孝讓皇帝廟號惠宗后馬氏曰孝愍溫貞哲睿肅烈
襄天福聖讓皇后追尊恭仁康定景皇帝諡曰符天建道
恭仁康定降文布武顯德崇孝景皇帝廟號代宗貞惠安
和景皇后汪氏曰孝淵肅懿貞惠安和輔天恭聖景皇后
徐氏曰按廟諡舊典代宗卽世宗明有世宗矣而景帝號
曰代宗不重出乎顧炎武曰當南京新立邦典繁多禮部
尙書顧錫疇素不考古一切諡號聽其門人謝復元撰定
以不學之宗伯任委巷之小夫諡冊一頒天下用爲譏笑

閭若璩嘗私質之遺臣李清答語與炎武說同附志之告
議禮者焉

庚寅明以左懋第爲兵部右侍郎兼都察院右僉都御史經
理河北聯絡關東軍務奉使於我

大清

高宏圖奏北使事宜一於天壽山特立國陵改葬梓宮一
割山海關外地一歲幣以十萬爲率一國書宜如古可汗
之稱一使禮宜遵會典不應屈膝以致辱命時議遣使而
難其人懋第以母喪請終制不許因請使北詔加是職與
左都督陳洪範太僕寺少卿兼職方司郎中馬紹愉偕往
紹愉崇禎時與陳新甲還款事於我

爲懋第劾罷者也懋第疏言臣此行致祭先帝后梓宮訪求東宮二王蹤跡誼不敢辭但經理通和兩事也如欲用臣經理則乞命洪範紹愉出使而假臣一旅偕山東撫臣收拾山東以待如用臣與洪範北行則去臣經理聯絡之銜而罷紹愉勿遣皆不許臨行又言臣此行生死未知敢願以辭闕之身効一言臣所望者恢復而近日朝政似少恢復之氣望陛下時時以先帝之仇北都之恥爲念瞻高皇之弓劍則念成祖列宗之陵寢見有離黍之傷撫江左之遺民則念河北山東之版圖不免陸沈之禍更望嚴諭諸臣整頓生馬勿以臣北行爲和議必成勿以和成爲足恃必能渡河而戰始能扼河而守必能扼河而守始能畫江

而安又言先帝殉難臣少由諫諍臣少也遠如幽燕之地
勿以在遠而忘近如汲真之流勿以逆耳而棄衆謹其言
齎金千兩銀十萬兩幣數萬端吏卒三千人護行時史可
法駐泗州與懋第相見謂曰經理具文耳通和詔旨也公
宜疾行無留以故所至山東豪傑稽首願效驅策者皆不
敢用慰遣而已八月渡河次滄州聞吳三桂已改封平西
王乃遣使以策命先授三桂喻來意三桂不發書緘冊上
攝政王王怒十月至張家灣令以百人人授四夷館洪範
無言懋第曰是以弱國見待也爭之再四乃改鴻臚寺且
遣官騎迎之建旄乘車肅隊而人懋第斬纓大經迎者訝
曰吉禮也而凶服將之可乎懋第曰國喪也並有母喪國

喪臣所同母喪所獨也迎者不能詰十四日戊辰我內院大學士剛林至戎服佩刀坐堂上責朝見懋第欲以客禮反覆折辨聲色俱厲索國書不答以所齎金幣及陵工之犒先之時我

朝初定中原中朝故事猶未深晰所往復辨論者皆諸降臣之指而懋第慷慨不撓剛林嘆曰此中國奇男子也厚爲客禮待之懋第旣不得謁陵乃陳太牢於寺廳率將士喪服三日哭攝政王聞而益重之

臣竊曰烏程溫睿臨曰江南雖立敗亡之餘耳而我

朝應天順人將相之豫和士馬之強盛甲兵之堅利駸駸乎有席捲囊括之勢爲江南計者重兵固守河淮而遣智辨之

士卑詞納款願爲我

朝輸歲幣畫大河爲界降臣家屬之在城者厚予賑撫以繫其
心毋令進說內戕猶恐未必聽從也而乃晏然自大執承
平故事而又佐以陰奸悖逆之陳洪範是知不屈膝之爲
不辱命而不知啓釁之爲敗國也臣竊以爲其說殊不然
是時閩獻尙稽

天誅燕齊多梗

王化使江南得賢令主用賢去奸和輯將士則淮上四鎮不皆
棘門霸上之軍江左義兵賢於新野下江之衆君臥寢室
之薪臣鼓中流之楫縱無望燕雲之大業亦可支瓊瑤之
偏安計不出此而欲卑詞納款以緩

王師則鼎臣奉使何解臥榻之言錢儼稱臣已入汴梁之邸徒
蹈瀛國人奴之辱無救厓門覆舟之亡至謂撫卹降臣以
冀其不進說內戕則吳三桂之冊封洪文襄之壇祭易嘗
動其廉頗用趙之心而爲不狃全魯之計哉謬說徒滋無
足論已

明命總兵金聲桓駐防揚州

聲桓字虎臣遼東人初爲總兵黃龍裨將與

王師戰於旅順龍敗死聲桓家口被俘脫身走入關投左良玉
軍積功至都督同知總兵官是年春路振飛調將防河聲
桓團練兩淮間得衆數萬史可法請之從征已命駐防揚
州

本朝紀年卷之十
明定守護鳳陵兵

定戍兵五千人

明以六等定從逆諸臣罪

是時成國勲衛宋元臣自言雜擔夫出京御史汪承詔自言拒僞政府點用侍郎吳履中巡撫郭景昌亦紛紛自理行宮前章奏雜投詹事項煜於王之卽位也混入朝班於是通政司劉士楨請嚴封駁參治之令令北歸諸臣靜聽朝廷處分不得紛然奏辨會舉朝以逆案攻阮大鍼大鍼憤甚見從逆諸臣有附會清流者倡言曰彼攻逆案吾作順案與之對以李自成僞國號曰順也士英因上疏曰縉紳之貪橫無恥至先帝末年而已極結黨行私招權納賄

以致國事敗壞禍及宗社闖賊入都之日死忠者寥寥降賊者強半侍從之班清華之選素號正人君子之流如科臣光時亨力阻南遷之議而身先迎賊襲鼎華降賊後每語人以小妾不肯爲辭其他逆臣不可枚舉臺省不糾彈司寇不行法臣竊疑焉更有大逆之尤者如庶吉士周鍾勸進未已復上書勸賊早定江南寄書其子稱賊爲新主盛誇其英武仁明及恩遇之隆以搖惑東南親友昨臣病中東鎮劉澤清來見誦其勸進表云此堯舜而多武功邁湯武而無慚德又聞其過先帝梓宮之前揚揚得意竟不下馬臣聞之不勝髮指其伯父周應秋周維持皆魏忠賢門下走狗鍾又爲闖賊之臣梟獍萃於一門逆惡種於前

世臣按律謀危社稷謂之謀反大逆不道宜加赤族之誅以爲臣民之戒今其胞兄周銓尙厠衣冠之列堂弟周鏞儼然寅清之署均當連坐以清逆黨其餘從賊諸臣分別定罪庶國法伸而人心儆於新政不無小補矣於是三法司倣唐制以六等定罪其大逆凌遲處死者五條凡從賊攻陷京師及爲賊毀宗社易門榜者凡倡率勸進及爲賊草偽詔者凡部院詹事翰林三品以上大臣從賊受僞命而親信用事者凡文武封疆大吏如督撫總兵降賊者凡京堂科道部屬等官爲賊畫策規取地方者以上如本犯不歸歸而又逃悉收繫其妻子籍沒其家產其斬決不待時者三條凡四品京堂及翰詹科道受賊僞命居要地比

原職加崇者凡方面分巡分守知府等官降賊者凡文武
封疆大吏聞變先逃者其絞者六條凡獻玉帛獻子女以
媚賊求免者凡內外衙門官僅受僞命者凡在巡方及布
按三司分巡分守知府等官遇變而逃者凡被賊拷掠不
能自決仍受僞命者凡受僞命而爲賊疎遠者凡各衙門
奉差如管屯管河樵關督餉等官雖無封疆之守而棄職
潛逃者其流者二條凡內閣重臣及部院等三品以上詹
事翰林五品以上卽不從賊而偷生潛逃者凡旣受僞命
復自疎遠見賊未敗而脫身南還者以上斬絞流共十二
則如各犯認罪自投擬減本罪一等如江防形蓄謀巨
測照本罪加一等仍收繫其親屬其徒者二條凡候者似

選卽無官守卽未受僞命而浮沈賊中賊奔乃還者凡遇賊變爲賊脅留而未受僞官者其杖者一條凡爲賊所拘未受僞官而乘間先歸者王曰北都淪喪帝后升遐巷戰死節者遂無一人且反面事仇甘心降賊爲之指斥先帝規并海宇人心已喪法紀何存其敘罪以上法司行撫按官逮解來京候訊流罪以下撫按官依律訊處具奏其有身雖陷賊能改圖歸正擒殺賊首及以兵馬城池來歸或爲內應克立大功或爲內閣效忠本朝者仍從優陞賞不用此例尋刑部尙書解學龍定一等應礫者朱企郊牛金星張嶙然曹欽程李振聲喻上猷黎志陞陸之祺高翔漢楊王休劉世芳等十一人也二等應斬決者光時亨鞏燦

周鍾方允昌等四人也三等應敘者陳名夏楊枝起廖國
遴王承曾原毓宗何孕光項煜等七人也四等應流者王
孫蕙梁兆陽錢位坤侯恂王秉鑑陳羽白申芝芳金汝礪
黃繼祖楊廷鑑劉大鞏郭萬象裴希度張懋爵吳達等十
五人也五等應徙者宋學顯沈元龍方拱乾穆沅呂兆龍
傅振鐸吳剛思方以智傅鼎銓張家玉等十人也六等應
杖者潘同春吳泰來張琦王于曜周壽明向列星李桐徐
家麟等八人也自絞以下聽贖俟定奪者何瑞徵楊觀光
張若麒方大猷黨崇雅熊文舉葉初春龔鼎章戴明說孫
承澤劉昌涂必泓張鳴駿薛所蘊趙京仕高爾儼衛周祚
黃紀張襄等十九人也其另存再議者翁元益郭充魯臬

吳爾璵史可程王自超白允謙梁清標楊樓鶚張元琳呂

崇烈李化麟朱積趙穎

攷日亦作趙穎又作趙穎

劉廷琮侯佐左懋泰

吳之琦鄒明魁許作梅龔懋熙王顯王之牧王皋梅鶚姬

琨朱國壽吳嵩允等二十八人也士英擬旨云周鍾不當

緩決陳名夏等未蔽厥辜侯恂宋學顯吳剛思方以智潘

同春等擬罪未合新榜進士盡污偽命不當復玷班聯令

再議明年正月學龍擬周鍾光時亨各加一等潘同春諸

臣皆候補小臣受僞無據仍執前議時馬阮必欲殺周鍾

而學龍欲緩其死乃謀之次輔王鐸乘士英注籍上之且

請停刑鐸卽擬俞旨士英怒之大鉞喉保國公朱國弼御

史張孫振詆學龍曲庇行私削學龍籍然馬阮報復爲事

褒誅任意方以智以無罪見逮

攷曰南畧甲申八月二日御史王孫蕃奏方以

智自虧臣節復撰偽書

方拱乾以特旨免罪李逢申以掠

死受卹

攷曰南畧十二月二十日受偽命李逢申乃掠死

惟向附東

林者不得免焉

徐鼎曰爰書所據得之傳聞原馬阮之意不過藉以快恩

仇制黨人立威自重非爲國家明正典刑也何足書且從

逆姓名前已敘列之茲錄其案不已贅乎曰此春秋欲蓋

彌彰之義也夫賊檜巨奸能拒邦昌之僞命子雲賢者亦

污新莽之大夫一事衡人詎成定論然名節至重君子謹

之存彼竹刑昭茲鼎鑄此傳鼎銓張家玉諸人所由泣血

搥心而悔之不及者也

明加河南義勇劉洪起李際遇總兵官

攷曰聖安本紀南畧並云七月初九日事

崇禎間河南羣盜起劉洪起者西平鹽徒與其弟洪超洪道及諸劉之洪勛洪禮者結寨自保嘗夜遣人入賊營取其馬賊憚之呼爲劉扁頭官權授爲西平都司奉巡按御史楊繩武檄捕泌陽盜郭三海之黨張五平侯鷺鷥誅之與汝甯沈萬登登封李際遇並雄河南羣寨間沈萬登眞陽大俠也七年甲戌汝人盛之友者起岳城萬登聚衆應之稱順義王之友等尋破滅萬登乃請降李際遇登封人幼讀書不應童子試而以飲食結交礦徒有陳金斗者自謂受天書能占候望氣際遇信之乘旱荒以倡亂官軍擒金斗並際遇妻子殺之際遇乘馬走脫與干大忠等各結

土寨際遇踞登封之玉寨大忠昭嵩之屏風寨大忠凶慘而際遇差平善以故鄰寨多歸之崇禎十五年壬午李自成陷汝甯授沈萬登爲偽威武大將軍萬登不受而與洪起等謀收復鳳督馬士英承制命爲副總兵自成既連陷河南州郡際遇等請降而洪起兄弟獨不可洪超洪道留守寨洪起一日夜走七百里求救於左良玉棘刺破足不知痛十六年二月洪起在西平數與老回回戰誅汝州偽官土寇趙發吾等歸之有衆十萬以忠勇稱而際遇亦殺偽官自効崇禎帝下詔褒獎自成在襄陽命一隻虎出河南袁時中大置偽官偽防禦使金有章虐於汝州萬登計縛之併偽汝甯府尹鄧璉等磔於市太監盧九德以聞

得旨優敘當是時自成圍李際遇於玉寨甚急會督師孫傳庭之兵出潼關圍乃解諸將亦莫能出兵助督師戰而以其間完守入保十七年甲申春沈萬登之中軍王民表殺洪起弟洪禮而攫其金洪起稱兵復仇合其黨郭黃臉金臬趙發吾以圍萬登於汝州汝人糧糗牛馬俱盡掘野草煮瓦松終之以食人彰德司理陳朱明改曰後改爲兩名潛夫家議和萬登顧不從五月朔城破洪起執萬登並其黨磔之乃自稱左平南麾下副將軍南至楚潁北抵大河無不奉約束六月自成僞權將軍袁宗第聞洪起破汝自德安馳而至洪起棄城復走左良玉軍宗第踞城五日移營入陝西洪起乃自楚歸擒南陽開封諸僞官傳送南都詔加

際遇洪起總兵官潛夫巡按御史潛夫以諸將中惟洪起最効忠請予掛將軍印不許洪起自稱受勅書進宮保州縣以下聽署用卽汝甯御史公署爲帥府設棨戟旌旗焉
明定京營如舊制

依北都舊制爲五軍神樞神機三大營各一營至十營以團練總兵官六人分統之杜宏域楊御蕃牟文綬各統一營至五營卞啓光竇國甯胡文若各統六營至十營

戊戌明馬士英乞休不允

明劉澤清疏許都察院左都御史劉宗周

宗周被召在道連疏請告不得命乃抗疏劾馬士英曰陛下龍飛淮甸天寶予之乃有扈蹕微勞入內閣進中樞官

銜世廕晏然當之不疑者非士英乎於是李沾侈言定策挑激廷臣矣劉孔昭以功賞不均發憤冢臣朝端譁然聚訟而羣陰且翩翩起矣借知兵之名則逆案可以燃灰寬反正之路則逃臣可以汲引而閣部諸臣且次第言去矣中朝之黨論方興何暇圖河北之賊立國之本紀已疎何以言匡襄之畧高傑一逃將也而奉若驕子浸有尾大之憂淮揚失事不難譴撫臣道臣以謝之安得不長其桀傲則亦恃士英卵翼也劉黃諸將各有汛地而置若弈棋洶洶爲連雞之勢至分割江北四鎮以慰之安得不啓其雄心則皆高傑一人倡之也京營自祖宗以來皆勲臣爲政樞貳佐之陛下立國伊始而有內臣盧九德之命則士英

有不得辭其責者總之兵戈盜賊皆從小人氣類感召而生而小人與奄豎又往往相表裏自古未有奄官用事而米自育極功於方域者惟陛下首辨陰陽消長之幾出土英仍督鳳陽聯絡諸鎮決用兵之策史可法卽不還中樞亦當自淮而北歷河以南別開募府與士英相犄角京營提督獨斷寢之書之史冊爲宏光第一美政王優詔答之而促其速入士英益怒佯具疏辭位且揚言於朝曰劉公自稱草莽孤臣不書新命是明示不臣也吏部候考宗室朱統鐸言宗周請移蹕鳳陽鳳陽高牆所在蓋欲以罪宗遠皇上而與史可法擁立潞王其兵已伏丹陽宜急備是時浙撫黃鳴駿入覲兵抵京口與防江兵相擊鬪士英聞

之而信亦震恐澤清初倚東林極重宗周至是恨甚具疏
痛詆言宗周勸往鳳陽爲謀不忠料事不智抗疏稱孤臣
無禮陰撓恢復不義欲誅臣等激變士心召生靈之禍不
仁疏未下復草一疏並署黃得功高傑劉良佐名上之言
諸人往以挺擊紅丸謀害皇祖母皇考今歲迎立時又力
戴疏藩詆誣聖德非臣等與馬士英朱國弼歃血訂盟書
約可法翊戴則天位久屬他人宗周謀危聖躬已見於駐
鳳陽一疏鳳陽無城郭止有高牆陛下新承大統欲安置
於烽火凶危之地此必非宗周一人逆謀乃姜曰廣吳牲
合謀也曰廣心雄膽大行詭言堅不快陛下之得位故密
運死黨宗周先翦除內外翊戴諸忠然後迫劫乘輿遷居

耳乞逮曰廣牲宗周三奸付法司明正其謀危君父之罪如牲等人都巨等卽渡江赴闕面詰其奸正春秋討賊之義疏入舉朝大駭先是澤清錄彙示傑傑曰我輩武人乃預朝事邪得功亦馳奏不預聞士英尼之不上史可法不平以諸鎮不知入告澤清聞之卽言疏實已出而良佐知狀可法駁議是何居心良佐黨於澤清亦疏言宗周力持三案爲門戶主盟倡議親征圖晁錯之自爲居守司馬懿之閉城拒君陛下旣不爲諸姦所容莫若順成其志暫幸鳳陽高宏圖言於王傳諭曰昔漢宣起於艱難魏丙合志唐肅興於靈武李郭同心今者袒分左右口構元黃天下事不堪再壞諸臣各宜和衷集事息競圖功庶幾君臣之

問禮全終始宗周不得已受命方宗周之在丹陽僧舍也

澤清輩遣刺客數輩迹之見其正容危坐不忍加害以七

月十八日入朝仍居蕭寺給事中陳子龍疏言憲臣老成

清直海內盡知今入國門不得一望天顏在陛下以方諭

大臣和衷恐憲臣慙直奏對之際復生異同然臣以陛下

疑畏君子之機從此而生恐君子有攜手同歸之志陛下

誰與共濟天下哉致曰此疏見南畧疏人不肖致曰明史稟三王傳釋史福王紀畧

載澤清疏許於八月誤也按三王傳載七月十三日戊戌

馬士英乞休不允即宗周疏勅上英時事又釋史本傳云

宗周以七月十八日入朝則澤清疏許亦七月時事蓋宗周幼士英而後士英乞休士英乞休而後澤清許宗周王

徐鼎曰先書士英乞休而繼以澤清政許何見小人之表

夷爲奸也自來廷臣假藩鎮之力以除異已卽其事出於正亦未有不覆國者况以無道行之乎內外交通紀綱墮裂士英澤清胡足責吾獨惜宗周之好直而絞也

明追削溫體仁諡尋復之

禮部尙書顧錫疇請追賜文震孟等諸臣諡而削體仁諡以正褒誅大義從之未幾御史張孫振劾錫疇險邪命錫疇致仕去議如舊

徐鼎曰尋復之何傷辱王之播弄於小人也

明予福府內臣蔭襲

蔭福府內臣屈尙忠田成張執中等弟姪谷都督同知世襲錦衣衛指揮使兵科陳子龍因上請慎名器疏謂陛下

間關南返從官幾何衛士奄尹寂寥無幾今大位既登來
者何衆不過其流何所底止必將人誇翼贊之功家切從
龍之念傷體害政非國之福夫勸功誘善惟在爵賞豐沛
故人文墨小吏自昔爲嫌朱紫盈門貂蟬滿座尤關國典
願陛下慎持之果係服勞有功但當賞之金帛不應授以
爵位以貽曹風不稱之譏犯大易負乘之戒不聽

庚子明擢開封推官陳潛夫爲御史巡按河南

放日南署云
七月庚子日

潛夫初名朱明字元倩錢塘人崇禎丙子舉人癸未冬除
開封推官輒抗疏言時事請召對不報時大河以南五郡
盡爲賊據開封被河灌虛無人長吏皆寄居封邱有勸潛
夫勿往者不聽會叛將陳永福縛巡按御史蘇京去潛夫

募民夫千人請於巡撫秦所式及總兵小從善許定國共
追勦莫應潛夫乃以十七年甲申正月奉周藩渡河居杞
縣召旁近長吏設宴皇帝位歃血誓守時開封東西諸土
寨攻殺無已潛夫開西平寨副將劉洪起勇而好義殺賊
有功躬往說之欽曰史外云土寨叟道一者最狡滑潛夫
單騎造其營勉以忠義道一叩頭聽命
以告身為偏裨諸賊爭降附按諸書無叟道一
名其漏記歟抑叟音同劉道一其別名歟俟收
五月五日方誓師而京師報陷乃縞素慟哭率洪起兵先驅至杞俘
偽官偽巡撫梁啓隆聞風遁去遂渡河而北大破賊將陳
德於柳園獲牛馬輜重無算時李自成已敗走山西洪起
檄南陽開封諸偽官潛夫露布傳送南都朝中大喜擢監
軍御史巡按河南潛夫乃入朝言中興在進取王業不偏

安山東河南地尺寸不可棄其間豪傑結寨自固大者數
萬小亦千人莫不引領以待官軍今四鎮之兵不下數十
萬人而齊魯汴豫尙皆安堵誠分命藩鎮一軍出潁壽一
軍出淮徐馬首北向使天下知朝廷有不忘中原之心則
人心思奮更頒爵賞鼓舞計遠近畫城堡俾以自守而我
督撫將帥屯銳師於要害以策應之寬則耕屯爲食急則
荷戈乘墉一方有警前後救援長河不足守也汴梁義勇
臣聯絡已定旬日可集十餘萬眾稍給糗糧容臣自將臣
當荷戈先驅諸藩鎮爲後勁則河南五郡可復五郡旣復
畫河爲固南聯荆楚西控秦關北臨趙衛上之則恢復可
望下之則江淮永安此今日至計也兩淮之上何事多兵

督撫紛紜並爲虛設若不思外拒專事退守舉土地甲兵
之利委之他人臣恐江淮亦未可保也當是時開封汝甯
間列寨百數洪起最大南陽列寨數十蕭應訓最大洛陽
列寨亦數十李際遇最大諸將中獨洪起志在効忠潛夫
請予掛印爲將軍馬士英不聽而用其姻婭越其杰爲巡
撫潛夫自九月入覲便道省親五日卽馳赴河上所建白
皆不用其杰老憊不知兵兵部尙書張縉彥總督山東河
南軍務止提空名不能馭諸將他寨聞潛夫來頗有歸意
是年冬十月蕭應訓復南陽及泌陽舞陽桐柏諸縣遣其
子三傑來獻捷潛夫飲之酒爲授告身鼓吹旌旗前道出
三傑喜過望謁其杰其杰故爲尊嚴厲聲詰責詆以賊三

僕大恨萌異心潛夫按行諸寨皆列旗幟鼓吹迎送其杰
間過之諸寨輒閉門不出其杰恚謂潛夫實使之譖於馬
士英歲終召潛夫還以凌駟代之潛夫亦遭外艱歸

徐籥曰特書何嘉之也當時多縱橫才徐孚遠何剛諸人
好抵掌談兵顧疏闊不可用而潛夫所陳洞合機宜就其
指挂危疆驅策羣寇蓋非殷深源之虛聲陳同甫之豪氣
所可同日語矣扼於權奸不竟其用惜哉

乙巳明在籍主事郭

攷曰亦作郭

獻珂敗圍城於桃園

僞將宋朝臣兵至杜勝集舊兵部職方主事郭獻珂微服

郟居召標將張成初與戰於桃園

攷曰桃園未詳所在

徐籥曰功微矣特書何春秋之義以討賊爲正也

臣等頃中旨以吏部右侍郎張有譽爲戶部尙書大學士高
宏圖封還詔書不聽

有譽字難譽江陰人長曆壬戌進士歷擢南京戶部右侍
郎兼右僉都御史抵任則福王立矣內官張執中監收白
糧勒費杖斃解戶有譽疏論之收其胥役送獄執中稍斂
因言對言一年經費須千餘萬今所入僅八百萬惟有裁
冗兵節冗食汰冗費自宮中始願聖明躬行節儉爲天下
先時上英銳意起大鍼而廷臣持之急思以中旨用之難
以發端以有譽人望也傳旨用爲戶部尙書宏圖謂有譽
才望堪用而中旨必不可開與吏科給事中章正宸封還
詔書不許兵科陳子龍亦疏言計臣清端敏練百僚所服

但古制爵人於朝與衆共之墨敕斜封覆轍可鑒萬一異
日有姦邪乘間左右先容銓司不及議宰輔不及知而竟
以內降出之臣等不爭則倖門日開爭之則已有前例立
國之始臣願陛下慎持之也亦不聽自是中旨紛然矣
臣竊曰書中旨何惜會推之法廢而倖進之門開也然則
會推之法無弊乎明季朋黨之禍激於會推我

朝列聖之論曰臺諫把持最爲明季陋習黜陟之權朕自操之
諸臣不得與聞蓋以會推爲殷鑒也然則何以惜之一人
獨斷草工欽承此

聖明天子之事非可論於中主也是時王政不綱姦邪在側會
推不廢則正論猶存中旨頻行則私門日進上下不交小

人道長明之所以亡也

庚戌明劉孔昭薦降賊臣錢位坤

徐鼎曰特書何勲臣而參銓部之權逆臣而污薦賢之牘
紀綱掃地至斯極矣

辛亥明釋安置鳳陽高牆前唐王聿鍵

聿鍵太祖九世孫小字長壽其先唐定王桧太祖第二十

三子

攷曰南疆釋史唐王紀畧誤作二十
二子茲從明史太祖諸子列傳正

封於南陽父器

璽唐世子母毛氏祖端王碩熿惑於嬖妾欲立其愛子囚

世子於承奉司聿鍵時年十二歲

攷曰黃宗羲行朝錄錢
澄之所知錄俱云方三

歲

亦從之讀書識大義處患難而意氣不挫年二十有八

尚未請名世子爲其弟毒死碩熿諱之將傳國於次子分

守道陳奇瑜知府王之桂

改曰五字據南畧
閩紀所知錄補

入弔謂碩燠

曰世子薨逝不明又不立其子事且露國法重無忽也碩

燠懼請名立爲世孫崇禎五年壬申碩燠薨聿鍵嗣位年

三十一矣選妃曾氏諸生曾文彥女七年甲戌流寇入河

南南陽當其衝城庳薄聿鍵捐千金修築知府陳俊豪

改

行朝錄所知錄
俱作陳振豪

弗授工聿鍵以爲言詔逮俊豪下獄已又

援潞王例乞增兵三千人以陳永福爲參將領之不許八

年冬賊再犯南陽聿鍵疏言臣府護衛一千二百人近制

以其半爲汴梁班軍給撫臣策使惟明詔念郡城單弱以

全軍見還崇禎帝報之曰南陽番軍班直祖制已久朕不

敢變時海內多故崇禎帝思廣羅賢俊召見宗人遴其才

擢之官發金匱書得高皇帝制曰宗室子孫入爲中朝官者得以其階換於是下詔援祖制郡王子孫文武堪用者攷驗授職禮部右侍郎陳子壯執不可聿鍵厯引前代故事詆之援據經傳皆有本子壯尋下獄聿鍵好尊宗藩體統總督盧象昇過南陽不朝聿鍵劾奏之又所建請多與廷臣相牴牾崇禎帝亦不之善也九年秋八月京師戒嚴聿鍵率護軍勤王又殺其兩叔汝南道周以興攷曰行朝錄作周以典止之不聽至裕州巡按御史楊繩武以聞下旨切責會前鋒值寇亡其內豎二人乃返國部議廢爲庶人安置鳳陽高牆押發官同知張有度欲以檻車行事鍵自裁不殊至鳳陽陵奄索賄不得用祖制塹鎖法以困苦之病幾殆

會妃刳股以進始愈時有望氣者以高牆中有天子氣言於淮撫路振飛振飛假賑罪宗入牆見聿鍵心異之詢知吏虐狀疏請加恩罪宗置吏無狀者石應詔於法南都立大赦出高牆七十五案凡三百四十一人放日本南都甲乙紀聿鍵亦出禮部請復王爵不許

徐鼎曰特書何爲閩中監國張本也不曰罪宗何明聿鍵之無罪也

明候考宗室朱統鐓疏訐大學士姜曰廣

士英大鍼必欲逐曰廣嗾朱國弼劉孔昭以誹謗先帝誣讎忠臣李國楨爲詞交章詆爲黨人時議復設廠衛曰廣言緝事不除宗社且不可知會蘇松巡撫祁彪佳上疏力

諫曰廣擬旨俞之不從則疏爭之士英大鉞益怒朱統鑽
者南昌建安王府鎮國中尉吏部候考者也希士英旨疏
言曰廣定策時懷異志詞連史可法張愼言呂大器等疏
入高宏圖票擬究治王坐內殿召輔臣入厲聲曰統鑽吾
一家何重擬也且責宏圖疏召可法還朝為非足踰二日
放日南界載統鑽前疏為七月二十六統鑽復疏劾按日
日辛卯事後疏為二十九日甲寅事統鑽復疏劾按日
炎武聖安本紀云大鉞怨曰廣甚統鑽一疏未愜意右諭
德李明睿與曰廣同邑相忌噤明睿參之明睿辭乃募建
安王統口再出此疏又曰統鑽猶曰宗生不辨菽麥者耳
統口固建安王也堂堂藩王乃為大鉞所驅無良極矣據
此是再疏非統鑽上矣然按劉士楨袁彭年不由通政司
云云與建安王不合且諸書亦無另一人之說蓋炎武時
避居常熟之郊於朝事亦曰廣五大罪一引用東林死黨
多得之傳聞不盡確也

鄭三俊吳甡等把持朝政以劉士楨為通政沮遏章奏以

王重爲文選廣植私人二令楊廷麟出劇盜於獄交聯江河大俠與水陸姦弁日窺南都聲息非謀劫遷則謀別戴三庇從賊諸臣四納賄五姦媳請並士植重廷麟及劉宗周陳必謙周鑣雷演祚俱置之理劉士植抗疏謂曰廣勁骨慤直守正不阿統額何人揚波噴血飛章越奏不由職司此真奸險之尤者豈可容於聖世禮科袁彭年曰祖制中尉必具啓親王給批齎奏若候吏部則與外吏等應從通政司封進今何徑何竇直達御前宜加禁戢不聽攻口督袁繼咸給事中熊汝霖亦有疏惟是汝霖疏中有以匪帖而送書臣語按匪帖是八月十一日丙寅事宗周去國是九月朔九日甲午事則汝霖上疏是九月無疑繼咸方在楚亦當是九月上疏也

徐鼎曰漢考宗室何疎而賤之之詞也疎賤也而參宰輔

冠履倒置萋菲橫行至斯極矣

壬子明福王詔諭羣臣

時羣臣紛爭曰甚王諭曰朕遭百六之運車書間阻方資
羣策旋軫故都乃文武之交爭致異同之目甚先皇帝神
資獨斷彙納衆流天不降康咎豈在上爾諸臣尙鑒於前
車精白乃心匡復王室若水火不化戈矛轉興天下事不
堪再壞且視朕爲何如主祖宗成憲弗尙姑息各宜欽承
朕言不再

明改正閣臣銜以尙書兼大學士

南都初立庶務草創以大學士兼尙書非制也至是改正
以尙書兼大學士

明大學士高宏圖請召史可法入直不報宏圖乞休亦不許

攷曰釋史高宏圖傳曰士英矯旨切責因力求去

我

人清攝政睿親王多爾袞遣使致書於明督師大學士史可法

攷曰史公答書爲九月十五日而諸書皆載此事於七月者蓋是時南北間阻七月遣使至九月而始達也東華錄載此爲六月事

攝政王聞南都立遣南來副將韓拱蔽等齎書貽可法曰
予向在瀋陽卽知燕京物望咸推司馬後入關破賊得與
都人士相接識介弟於清班曾託其手泐平安拳致東國
未審何時得達比聞道路紛紛多謂金陵有自立者夫君
父之讐不共戴天春秋之義有賊不討則故君不得書葬

新君不得書卽位所以防亂臣賊子法至嚴也閩賊李自成稱兵犯闕荼毒君親中國臣民不聞加遺一矢平西王吳三桂界在東陲獨效包胥之哭朝廷感其忠義念累世之夙好棄近日之小嫌爰整貔貅驅除梟獍入京之日自崇懷宗帝后諡號卜葬山陵悉如典禮親郡王將軍以下一仍故封不加改削勲戚文武諸臣咸在朝列恩禮有加耕市不驚秋毫無擾方擬秋高氣爽遣將西征傳檄江南連兵河朔陳師鞠旅戮力同心報乃君國之仇彰我朝廷之德豈意南州諸君子苟安旦夕弗審事幾聊慕虛名頓忘實害予甚惑之國家之撫定燕京乃得之於閩賊非取之於明國也賊毀明朝之廟主辱及先人我國家不憚征

繕之勞悉索敝賦代爲雪恥孝子仁人當如何感恩圖報
茲乃乘逆賊稽誅王師暫息遂欲雄據江南坐享漁人之
利揆諸情理豈可謂平將以爲天塹不能飛渡投鞭不足
斷流邪夫闖賊但爲明朝崇耳未嘗得罪於我國家也徒
以薄海同仇特申大義今若擁號稱尊便是天有二日儼
爲敵國予將簡西行之銳轉旆東征且擬釋彼重誅命爲
前導夫以中華全力受困潢池而欲以江左一隅兼支大
國勝負之數無待蓍龜矣予聞君子之愛人也以德細人
則以姑息諸君子果識時知命篤念故主厚愛賢王宜勸
令削號歸藩永綏福祿朝廷當待以虞賓統承禮物帶礪
山河位在諸王侯上庶不負朝廷中義討賊興滅繼絕之

初心至南州羣彥翩然來儀則爾公爾侯列爵分土有平
西王之典例在惟執事實圖利之晚近士大夫好高樹名
義而不顧國家之急每有大事輒同築舍昔宋人議論未
定兵已渡河可爲殷鑒先生領袖名流主持至計必能深
維終始豈忍隨俗浮沈取舍從違應早審定兵行在即可
西可東南國安危在此一舉願諸君子同以討賊爲心毋
貪一身瞬息之榮而重故國無窮之禍爲亂臣賊子所笑
予實有厚望焉記有之惟善人能受盡言敬佈腹心仁聞
明教江天在望跼踖爲勞書不宜意可法表上其書勸王
爲自強計卽自具答書曰南中向接好音法隨遣使問訊
吳大將軍未敢遽通左右非委隆誼於草莽也誠以大夫

無私交春秋之義今佞僇之際忽奉琬琰之章真不啻從
天而降也循讀再三殷殷致意若以逆賊尙稽天討煩貴
國憂法且感且愧懼左右不察謂南中臣民偷安江左竟
忘君父之仇敬爲貴國一詳陳之我大行皇帝敬天法祖
勤政愛民真堯舜之主也以庸臣誤國致有三月十九日
之事法待罪南樞救援莫及師次淮上凶問遂來地坼天
崩山枯海泣嗟乎人孰無君雖肆法於市朝以爲泄泄者
之戒亦奚足謝先皇帝於地下哉爾時南中臣民哀慟如
喪考妣無不拊膺切齒欲悉東南之甲立剪凶仇而二三
老臣謂國破君亡宗社爲重相與迎立今上以係中外之
心今上非他神宗之孫光宗猶子而大行皇帝之兄也名

正言順天與人歸五月朔日駕臨南都萬姓夾道歡呼聲
聞數里羣臣勸進今上悲不自勝讓再讓三僅允監國迨
臣民伏闕屢請始以十五日正位南都從前鳳集河清瑞
應非一卽告廟之日紫氣如蓋祝文升霄萬目共瞻欣傳
盛事大江湧出枹梓數十萬章助修宮殿豈非天意也哉
越數日遂命法視師江北刻日西征忽傳我大將軍吳三
桂借兵貴國破走逆成爲我先皇帝發喪成禮掃清宮闕
撫輯羣黎且罷薙髮之令示不忘本朝此等舉動振古鏗
今凡爲大明臣子無不長跪北向頂禮加額豈但如明諭
所云感恩圖報已乎謹於八月繕治筐篚遣使犒師兼欲
請命鴻裁連兵西討是以王師旣發復次江淮乃燁明旃

引春秋大義來相詰責善哉言乎然此爲列國君薨世子
應立有賊未討不忍死其君者立說耳若夫天下共主身
殉社稷青宮皇子慘變非常而猶拘牽不卽位之文坐昧
大一統之義中原鼎沸倉卒出師將何以維繫人心號召
忠義紫陽綱目踵事春秋其間特書如莽移漢鼎光武中
興丕廢山陽昭烈踐祚懷愍亡國晉元嗣基徽欽蒙塵宋
高繼統是皆於國讐未翦之日亟正位號綱曰未嘗斥爲
自立率以正統予之甚至如元宗幸蜀太子卽位靈武議
者疵之亦未嘗不許以行權幸其光復舊物也不朝傳世
十六正統相承自治冠帶之族繼絕存亡仁風遐被貴國
昔在先朝風膺封號後以小人構釁致啓兵端先帝深痛

疾之旋加誅戮此殿下之所知也今痛心本朝之難驅除
亂逆可謂大義復著於春秋矣若乘我國運中微一旦視
同割據轉欲移師東下而以前導命元兇義利兼收恩仇
倏忽獎亂賊而長寇仇此不惟孤本朝借力復仇之心亦
甚違殿下仗義扶危之初志矣昔契丹和宋止歲輸以金
綰回紇助唐原不利其土地况貴國篤念世好兵以義動
萬代瞻仰在此一舉若乃乘我蒙難棄好崇仇規此幅員
爲德不卒是以義始而以利終爲賊人所竊笑也貴國豈
其然乎往者先帝軫念潢池不忍盡戮勦撫互用貽誤至
今今上天縱英武刻刻以復仇爲念廟堂之上和衷體國
介冑之士飲泣枕戈忠義兵民願爲國死竊以天亡逆闖

當不越於斯時矣語曰樹德務滋除惡務盡今逆賊未伏
天誅謀知捲土西秦方圖報復此不獨本朝不共戴天之
恨抑亦貴國除惡未盡之憂伏乞堅同仇之誼全始終之
德合師進討問罪秦中共梟逆賊之頭以洩敷天之忿則
貴國義問照耀千秋本朝圖報惟力是視從此兩國世通
盟好傳之無窮不亦休乎至於牛耳之盟本朝使臣久已
在道不日抵燕奉盤盂從事矣法北望陵廟無涕可揮身
陷大戮罪應萬死所以不卽從先帝於地下者實爲社稷
之故傳曰竭股肱之力繼之以忠貞法處今日鞠躬致命
克盡臣節而已卽日獎率三軍長驅渡河以窮狐兔之窟
光復神州以報今上及大行皇帝之恩貴國卽有他命弗

敢與聞惟殿下實昭鑒之

改曰史公答書原札尙存內閣書用紅帖寫皮面寫各字蓋印

日督師輔臣之印每頁四行寫連抬頭共二十字一行刻

銓云大明國督師兵部尙書兼東湖大學士史可法頓首

謹啓大清國攝政王殿下書尾署云宏光甲申九月十五

日又南畧云桐城何亮工爲史公幕賓此書乃其手筆

臣竊伏讀

純廟之論曰幼年卽羨聞我攝政睿親王致書明臣史可法事

而未見其文昨輯宗室王公功績表傳乃得讀其文所爲揭大

義而示正理引春秋之法斥偏安之非旨正詞嚴心實嘉之而

所云可法遣人報書語多不屈固未嘗載其書語也夫可法明

臣也其不屈正也不載其語不有失忠臣之心乎且其語不載

則後世之人將不知其何所謂必有疑惡其語而去之者是大

不可也因命儒臣物色之書市及藏書家則亦不可得復命索

之於內閣冊庫乃始得焉卒讀一再惜可法之孤忠歎福王之
不慧有如此臣而不能信用使權奸掣其肘而卒至淪亡也福
王卽信用可法其能守長江而爲南宋之偏安與否猶未可知
而况燕雀處堂無深謀遠慮使兵頓餉竭忠臣流涕頓足而歎
無能爲力惟有一死以報國是不大可哀乎且可法書語初無
諛諂不經之言雖心折於睿王而不得不強詞以辨亦仍明臣
尊明之義也余以爲不必諱亦不可諱故書其事於右而可法
之書並命附錄於後焉

明太僕寺少卿萬元吉奏

天清兵南征

元吉奏平西王吳三桂牌至濟甯稱奉

天清攝政王旨云云執政謂款使已行不以爲意

八月丙辰朔日有食之

丁巳明福王親祀孔子

明命光祿寺少卿沈廷揚饋吳三桂軍廷揚疏止之不許

廷揚字季明崇明人爲人多智好談經濟崇禎中由國子
生爲中書舍人議復海運稱旨命赴淮安專督海運事宜
加光祿寺少卿南都立命以原官督餉饋江北諸軍疏言
臣愚年海運有舟百艘皆高大完好中可容兵三百人水
手亦皆熟知水道便捷善鬪今海運已停如招集水師加
以簡練則二萬人之衆足成一軍亦長江之衛也疏上不
報已廷臣有請由海道出師北伐者嘆曰誠使是策得行

願爲前軍已而不行命運米十萬餉三桂軍廷揚以道梗
不可行祈止之不許

明偏沅巡撫以楊鶴爲兵部右侍郎兼都察院右僉都御
史總督川湖雲貴廣西軍務

明加閣臣銜

史可法少保兼太子太保武英殿大學士高宏圖太子少
師文淵閣大學士姜曰廣太子少保文淵閣大學士馬士
英太子太師武英殿大學士王鐸太子少保文淵閣大學
士各予廕有差

徐鼎曰是舉也或曰加翊戴新恩

攷曰本南都甲乙紀

或曰以太后

至

攷曰本釋史姜曰廣傳

均之濫也故畧之

明以賀世壽爲戶部尚書總督倉場

壬戌明復東廠降禮科給事中袁彭年爲浙江按察使照磨
彭年公安人崇禎甲戌進士疏言高皇帝時不聞有廠相
傳文皇帝十八年始立東廠命內臣主之此不見正史惟
大學士萬安行之亦不聞特以緝事著嗣後一盛於成化
然西廠汪直踰年輒罷東廠尙銘有罪輒斥再盛於正德
邱聚谷大用相繼用事逆瑾扇虐天下驟然三盛於天啓
逆魏之禍幾危社稷近事之明鑑也自此而外列聖無聞
夫卽嚴衙之興廢而世運之治亂因之頃先帝亦嘗任廠
衛緝訪矣乃當世決無不營而得之官中外亦有不脛而
走之賄故逃網之方卽從密網之地而布奸僞之事又資

發奸之人以行始猶帕儀交際爲人情所有之常後乃賂賄萬千成極重莫返之勢豈非以與援之途愈祕而專傳送之闕愈曲而費乎究竟刁風所煽官長不能行法於胥吏徒隸可以迫脅其長上不可不革也疏入王責其狂悖

沽名降三級調外

攷曰甲乙紀載八月二十九日甲申禮科袁彭年奏江陵舉人陳萬策李開先

不受僞檄事豈彭年被請後又用邪抑彭年早奏聞至二十九日始下部邪俟攷

徐鼎曰曰降某官爲某官何明不當降以嘉之也無行如彭年猶足嘉乎君子有不善而諱之則或以君子小惡爲無傷小人有善而沒之則或以小人爲善爲無益君子不懼於失足而小人無望於蓋愆無惑乎爲善者之少而爲不善者之多矣隨事見褒貶而無所假借於其間所以明

是非之公而大勸懲之義也

明起前薊督丁魁楚巡撫承德襄陽等處

魁楚河南永城人以失機遣戍崇禎戊寅納餉援例得歸
總兵劉超之叛也劫魁楚與衆紳爲疏訟冤魁楚計款之
超平敘功復職至是會推總制乃起用

徐鼐曰何以書爲閩亭張本也不備書官何削之也

獻賊陷明資陽縣知縣賀允選不屈死

允選丹陽舉人被執不屈賊處之別營至乙酉冬被殺十

七口俱死

攷曰按緩寇紀畧賊騎兵自資陽破成都是破資陽在成都前也

徐鼐曰不屈死何歷二年而不屈是所謂從容就義者歟
不曰何闕疑也

甲子獻賊陷明成都蜀王至澍太平王至涿巡撫龍文光升
巡撫前巡按劉之勃等死之

賊自重慶趨成都州縣望風瓦解蜀王謀遷於滇巡按劉
之勃力持不可內江王至沂與之勃爭王乃以六月十三
日成行守門卒洶洶亂輜重有被掠者迺止之勃請王出
賞募士殺賊王以祖制不典兵爲辭城中一日數驚火藥
局灾雷震王寢殿大雨雹王懼方出財招募三日無應之
者七月新撫龍文光總兵劉佳允率兵三千從川北來謀
設守而王宗大姓逸去者半八月之五日賊騎兵自資陽
水兵自洪雅新津蒲城下佳允出戰敗還文光見涿涸急
遣郫縣王簡趙嘉焯決灌縣堰水以益之初九日大雷雹

雨如注守陣者不能立賊火攻如取重慶法西北阻錦江
樓崩木石飛空賊蜂擁入不踰時灌縣水至而城已陷矣
王與其弟太平王至淶妃邱氏宮人素馨等投井死文光
馬平人天啓壬戌進士厯官川北參政擢右僉都御史代
陳士奇巡撫四川賊已逼成都文光自順慶馳赴之城陷
投浣花溪死致曰明史云之勃寶雞進士賊以同鄉欲用
之之勃罵不屈賊縛於端禮門外攢矢射之之勃厲聲曰
甯多剛一刀少殺一百姓賊磔其屍同時文臣殉難者按
察副使張繼孟兵備副使陳其赤僉事張孔教升建昌兵
備僉事劉士斗同知方堯相華陽知縣沈雲祚成都知縣
吳繼善蜀府長史鄭安民郫縣主簿趙嘉煒教授何某等

十一人繼孟扶風進士以御史論事忤旨出爲知府進副
使分巡川西被執幽之大慈寺獻忠之僭號也欲用之不
屈被殺妻賈氏從死其赤崇仁進士以吏能擢副使轄成
都投百花潭死孔教會稽舉人不屈死子以衡匿不告其
母孔氏孔知之刀斷喉死攷曰明史云以衡奉母南窺孔
書室見副使周夢尹請師典疎痛絕罵以衡曰父死二
年我尚偷生使我無顏見汝父地下遂取刀斷喉死士
斗番禺進士成都推官之勃薦升建昌兵備賊逼之勃促
之行士斗曰安危死生同此耳方之勃與賊語士斗呼曰
此賊也公不可屈獻忠命梓以上反顧之勃語如前遂闔
門被殺堯相黃岡人與之勃請餉於蜀王不應遂投王府
河以拯起被執遇害於萬里橋雲祚太倉進士賊破夔州

雲祚走謁蜀王陳守禦策不見用與之勃士斗俱幽於大
慈寺絕粒半月不死賊餽之食雲祚躍起大罵曰我欲食
賊肉豈食賊粟邪遂同遇害蜀友人匿之山中越二十年
始繼善亦太倉進士服闋補成都令上書於蜀王累數百
言攷曰繼善書載在蜀碧其詞曰高皇帝眾建藩輔恭置
綽錯數年以來貽命亡氏失其國家此數王者非真有
敗德失道不見絕於天也直以擁富貴之資徂便安之計為
賊所利而不思自全此非殿下前車之鑒乎今楚氛日惡
秦關失守曹關姚黃陸梁左右殿下付之悠悠而不恤夫
全蜀之險右邊不在腹若設重戍於夔門劍閣誠足自固
否則黃牛白帝亦屬夷庚黑水陽平更多歧徑迺欲坐守
門庭請為設險不可解者一也往者蘭酋撲滅獻賊逃遁
只以蘭兵力有虧缺地利不習今日荆襄撤其藩籬秦隴
寒其唇齒揣星賊情益無顧忌而欲援引前事冀倖將來
不可解者二也至於錦城之固不及秦關白水之險豈踰
湘漢此可恃以無虞彼何為而失守且城加孤注救援先
窮時及嚴冬長壕尤易果卵不足喻其危屠火不足明其
急而猶事泄泄以幸苟免不可解者三也為殿下計宜召

境內各官詔誦謀議發帑金以贖成卒散朽粟以慰饑民
出明禁以絕斷養蒼頭錫積逋以免流離溝瘠募民兵以
守隘結葬日以資援政教內修聲勢外振則可易危為安
轉禍為福苟或不然蜀事誠莫知所終竊為殿下危之王
不能城破一家三十六人同遇害或曰降賊被殺善之凡

見吳偉業文集及蜀碧而顧炎武聖安本紀注毛奇齡趙
少府墓誌銘謂繼善實未死他書亦有謂繼善降賊者存
之以安民不屈死張繼孟傳蜀碧嘉煒山陰人決堰還

遇賊射之投水死求父屍不得遇堰夫告以死處為三渡

趙少府墓誌銘畧同何教授者失其名坐明倫堂上夫

婦自縊死蜀碧武臣之最著者劉佳允川北進士偕文

光赴浣花池死同死者總兵張奏功世襲指揮馬震張卜

昌羅大爵劉鎮藩阮士奇參將徐蛟都司僉書李之珍或

陷陣死或巷戰死豪則云總兵劉鎮藩出戰而死

之不言佳允豈佳允又名鍾藩歟按給事中吳宇英工部
蜀碧則確是二人並志之以俟攷焉主事蔡如蕙聞蜀藩殉難死順天府治中莊祖詔同弟致
仕按察司祖誥同罵賊死大理寺正王秉乾驅閭家投井
死宣化府同知王履亨被執投江死東流知縣乾曰貞以
磚斃一賊死皆致仕在籍者也父子同死者二人明經趙
鴻偉及子進士昱明經邱之坊及子庠生祖福皆以賊召
不應死夫妻同死者二人內江張於廉致仕彭澤知縣也
與妻鍾氏同罵賊死安縣監生李資生宣大總督鑑之子
也與妻董氏並自縊死賊大搜藩宗朱氏兄弟某者投水
死妻李氏姊妹而姊妹也聯袂投江死諸生王某之妻熊
氏罵賊死又有聞蜀藩殉難死者則郫縣舉人江騰龍不

應賊召死者則諸生劉繼皋費經世劉宏芳皆其姓名可

攷者也

攷日本蜀碧

是役也獻忠將盡屠蜀人偽平東將軍孫

可望流涕諫曰王轉戰十年所過屠滅無尺寸之地以守

非將士相從意也今出萬死爭斯土庶幾爲王成霸業耳

若又屠其衆某等何用生爲請王手中劍刎頸先百姓死

矣獻忠乃止士民爭門阻於城闔不得出驅之至中園中

園者先主練兵處也獻忠列其兵爲甬道閱民而過之壯

婦少男皆入其營中父子夫婦相失散巷市搜牢一空焉

攷曰明史藁曰賊將戮人忽有龍尾下垂賊以爲瑞遂停刑

徐璉曰嘗聞明高皇諸子蜀獻王好學高皇呼爲蜀秀才

選名儒侍講幄購藏圖書甚富而世傳獻王得鴻寶之書

於內府子孫善黃白治化然皆積不用恃其都爲天險無復遠慮以祖宗之制不典兵不與民事故詩餉弗聽請召募弗聽夫蜀自甲戌乙亥之間賊兵蹂躪者再亂之初生既無曲突徙薪之智死其將至又無臨渴掘井之謀火已燃眉珠猶剖腹此與福楚諸藩頑愚一轍亦可傷矣自監司以下何以不書不可勝書則以大員冠之亦書大學士范景文等死之之例也

獻賊陷明崇慶知州王勵精死之

勵精蒲城人成都既陷州人聞風先避其僕勸之去勵精不可具朝服北面拜復西向如禮從容於甬壁書孔曰成仁數語登樓以利刃縛柱貯火藥樓下條報賊騎渡江縱

火焚樓觸刃貫胸死所書字風雨不滅後二十餘年州人
建祠祀之祀畢壁卽頽遠近歎異

獻賊陷明新津漢州

新津拔貢王源長邑人也爲賊所執與妻徐氏並不屈死
有袁氏者諸生藍燦妻也燦死於賊袁氏聞而自縊漢州
江某妻陶氏被執不辱偕其子婦張氏罵賊死又有張氏
婦者聞賊逼自紉其衣投井死數日出其屍顏色如生

獻賊陷明彭縣什邡

賊將孫可望畧彭縣諸生祝不傳負母逃賊追及求以身
代母不許遂大罵同死劉昌祚亦諸生被執不屈死魯城
惶者失其名城隍其綽號也被執至成都大罵割其舌噤

血復罵賊寸磔死業醫徐履端者赴水死其女子死者劉
姓妻黃氏死於雷打廟趙姓妻官氏先縊死其數女而後
自縊什那顧姓妻賈氏焚其室偕子婦某氏縊死火中

獻賊陷明絲州

時關南道劉宇揚妻李氏侍郎劉宇烈妻張氏大學士劉
宇亮妻宋氏避西山白崖溝賊將劉文秀訪得之三氏相
謂曰吾姑昔日涪水遇盜懼辱投水死吾輩受污何以見
姑於泉下同縊死宇亮子裔盛受僞官妻王氏曰汝可作
賊官吾不能作賊妻也亦縊死

獻賊陷明絲竹義民楊國柱戰死

國柱貢生可賢子也先是崇禎庚辰獻賊犯絲竹獲可賢

挾之曰汝子國柱守城召之降則免可賢佯許臨城語其子曰賊不滿千汝第堅守勿以我爲念賊殺之至是城陷國柱率士民數萬巷戰力竭罵賊死典史卜大經偕其僕白縊死邑民黃守學以孝聞賊圍城母柳氏自縊死守學殲畢亦縊死諸生陶修吉同妻龐氏被縛中途投崖死顧生妻留氏抱幼女投井死文姓妻刁氏有美色賊逼之罵愈厲支解死楊生妻蕭氏王姓妻袁氏俱拒賊死

獻賊陷明仁壽知縣劉三策舉人賈鍾斗生員劉士愷龍明新戰死

三策饒州舉人賊至誓死守每謂人曰事迫矣吾惟有不動心三字耳鍾斗士愷明新先後起兵拒賊城陷與三策

俱死之士女同死者貢生顧鼎鉉諸生陳素陳應新左灼
及灼妻閔氏又有辜氏女者及笄未嫁自刎死或曰三策
死於十三年是時死者爲顧繩詒

明并初義民雷應奇起兵拒獻賊不克死之

應奇素負俠氣賊至曰奈何郡縣無一殺賊者糾義勇拒
於高境關追至桑園力殺數賊死焉

徐薊曰曰戰死曰不克死之何嘉其不徒死也在野草莽
之臣無必死之義也虎狼孔迫雞犬皆驚強者走險弱者
引決非必皆西山之恥周粟東海之奮秦帝也其人與事
爲鄉黨所耳熟者學士聞而志之而窮簷蔀屋之駢死無
可考者可勝數哉有事可紀則別白書之亦能執干戈以

衛社稷則不殤之義也

獻賊陷明汶川

攷曰蜀碧作汝川縣按明史四
川無汝川縣汝川乃汶川之譌

邑歲貢高仲選偕其子女投江死

徐嘉曰自陷崇慶以下悉不日何無可攷也則以事類書
之

戊辰明太后鄒氏至自河南

太后至自河南命靈壁侯湯國祚告於南郊輔臣高宏圖
姜曰廣迎於郊外次日諭戶兵工三部搜括以備賞賜御
用監請一應器物並宮殿陳設金玉值數十萬兩於是工
部尚書何應瑞侍郎高倬疏請節省不聽尋命修西宮之
西園爲皇太后宮封太后弟鄒存義爲大興伯

明起前兵部右侍郎樊一蘅總督川陝軍務

一蘅字君帶宜賓人萬厯己未進士以知縣入爲吏部郎中崇禎三年遷榆林兵備參議流賊多榆林人又久荒饑民益相挺爲盜一蘅撫創殘修戎備討斬申在庭馬丙貴平不沾泥累遷右參政分巡關南總兵曹文詔敗歿羣賊迫西安總督洪承疇令一蘅監左光先等軍連破賊又屢挫賊於漢中十二年擢僉都御史代鄭崇儉巡撫甯夏被劾罷歸十六年冬用薦起兵部右侍郎總督川陝軍務道阻命不達至是復申前命

明起成籍越其杰

亦作傑

巡撫河南兼轄潁亳二州軍務

時馬士英借危疆爲名欲起阮大鍼爲河南巡撫廷臣持

不可乃用其杰其杰貴州舉人崇禎時厯官按察司僉事以貧遣戍閒居金陵士英之妹夫也故有是命

明命吏部察才品堪用者發督撫軍前補地方官

史可法疏曰國家設四藩於江北非爲江左偏安計也將欲立定根基養成氣力北則爲恢復神京之計西則爲澄清關陝之圖一舉而遂歸全盛耳聖明在上忠義在人君父之仇恥特深海宇之羣心競奮乘時大舉掃蕩可期所慮者兵戈擾攘之中不復有百姓耳無百姓何利於有疆士故此時擇吏不緩於擇將而救亂莫先於救民所謂得一賢守如得勝兵萬人得一賢令如得勝兵三千人正今日之謂也前此北都未破求牧方殷非不有破格之陞除

何曾收得人之實效地有難易缺有炎冷兵荒破殘之區
卒舉而授之庸人此豈白面書生所能勝任目今人才告
乏東南缺員安能復填西北之缺則銓選法窮安得不改
爲徵辟往時保舉多係慕繒故捷足蠅營眞才裹足今西
北則危地也危則人人思避而眞從君父起念者乃始投
袂相從宜令撫按司道及九卿科道各舉才膽過人堪拯
危亂者一人赴臣軍前効用酌補守令缺員二年考滿平
以優錢不望用示酬勸再如江北山東河南一帶有能保
護地方爲民推服者卽係桑梓之邦亦可權宜徑用總求
天恩破格假臣便宜決不敢濫用匪人自誤進取也王命

吏部察廢員及舉貢監生才品堪用願効力危疆者咨發

督撫軍前以補地方缺官

攷日本南都甲乙紀

明中旨以張捷爲吏部左侍郎吏科給事中章正宸爭之不

聽

捷丹陽進士以知縣入爲御史崇禎時坐事除名贖徙南

都立劉澤清首薦捷馬士英繼之廷議多持不可以魏國

公徐宏基薦遂內傳起故官給事中章正宸以內批非制

爭之得旨前解學龍薦葉廷秀亦徑批陞何以寂無一言

攷日本南都甲乙紀又明季遺聞云以兵部侍郎解學龍薦內批原任戶部主事葉廷秀爲都察院堂官

徐熹曰葉廷秀之內批不爭固已張有譽之內批不嘗爭

之手總之有張捷阮大鍼之內批而姑以有譽廷秀嘗之

也陳子龍之言曰爭之則已有前例是士英所以籍衆口夫

內子明遠禮部員外郎周鏞山東按察司僉事雷嶺祚下獄
鏞字仲馭號鹿溪金壇人父泰時雲南布政使鏞舉鄉試
第一崇禎戊辰進士官禮部主事抗疏論不當寵任內官
罷斥言官崇禎帝怒斥爲民自是知名鏞伯父尙書應秋
叔父御史維持以黨附魏閹列逆案鏞深恥之通籍後卽
交東林矯矯樹名節阮大鍼之廢居金陵也鏞與諸名士
爲留都防亂揭帖逐之大鍼懼而匿身牛首山或謂大鍼
曰周鏞之名以誦公而重諸名士之黨又以誦公者媚鏞
於是大鍼怨鏞刺骨鏞從弟鍾與鏞以才相忌各招致門

徒立門戶兩家弟子遇於塗不交一揖鍾旣降賊鎮門人
徐時霖等益被以惡名南都之議立君也呂大器姜曰廣
主潞王鏞與雷縯祚往來遊說故馬阮欲以此致二人於
死縯祚字介公太湖人也崇禎庚午舉於鄉崇禎帝思破
格用人命舉貢悉就銓用凡二百六十三人時號庚辰特
用縯祚得刑部主事踰年擢武德兵備僉事劾督師范志
完縱兵淫掠折餉行賄召入朝與志完面質於中左門縯
祚因言周延儒招權及其幕客重延獻通賄狀延儒由是
被放志完誅而令縯祚回任縯祚初覲得總憲故極意攻
擊及是頗沮喪廷臣遂以是忌之縯祚曰廣之門人也士
英欲逐曰廣乃令朱統鉞誣劾之而指鏞縯祚爲曰廣私

黨士英亦劾周鍾從逆牽連及鍾於是鍾與續祔及鍾等
俱逮治鍾之叔父維持與鍾弟前蕭山知縣銓奏言家門
不幸鍾鍾兄弟成隙鍾私刻燕中紀事國變錄諸書偽撰
勸進表下江南策以誣鍾且鍾於陛下登極首倡異謀是
鍾罪止一身鍾實罪在社稷也獄急鍾屬御史陳丹衷致
書幣求解於士英爲邏者所獲丹衷坐謫御史羅萬爵上
疏痛詆鍾且徧詆東林明年三月誅妖僧大悲御史王懷
因言斬百大悲不如斬周鍾雷續祔二人者妖所由興也
夫眞主旣出海內帖然乃今日冒稱皇子明日冒稱皇后
希踵王郎故智實由二人譏訕新政造謗宮閣故訛言繁
興若不立斬二人恐魚腹藏書狐號叢野乘間竊發阮大

鉞亦曰陛下龍飛之初可爲寒心曰廣尙不敢爲賈充而
演祚公然欲爲成濟宜立正西市會左兵犯關檄中有構
陷鑣演祚語士英大鉞益怒謂二人實召左兵趣賜自盡
乃各作家書又互書先帝遺臣於腹投纆死遺命勿葬如
伍子胥抉目事置棺雨花臺側未浹月而南都破矣

徐鼎曰特書何傷之也鑣矯矯樹名節而兄弟相殘賊演
祚冀以攻訐獲光寵皆未爲聞道者矣何傷乎爾是時馬
阮欲以黨禍殺清流校尉四山善類一空馴致老成掛冠
晉陽興甲倉皇泥馬荆棘銅駝人之云亡邦國殄矣同時
逮者有周鍾項煜光時亨武懷何以不書誅所當誅常刑
也

及曰釋史云司寇高公倬擒鍾至開新竹篋對衆杖之
數十應於市南畧云鍾殺於大中橋臨刑謂衆曰我飛

天下遂太平乎時年四十四又談往云
項燭出獄走慈谿慈谿素惡之沈諤河

明贈吳三桂父勦遼國公母祖氏遼國夫人

劉澤清請褒封吳勦使三桂銜恩劉孔昭奏三桂父子効
忠宜加殊禮時舉朝皆知三桂無心故國而奸黨故欲崇
之

徐鼎曰特書何譏諺也

明命王永吉戴罪總督山東軍務

從高宏圖何應瑞請也

庚辰明選淑女及內官

先是八月丁巳給事中陳子龍奏言中使四出搜採有女
之家黃紙帖額閨井騷然明旨未經有司殊非法紀又收

選內員慮市井無賴自宮希進先朝若瑾若賢皆壯而白
宮者也御史朱國昌亦言歷選宮嬪必巡司州縣開報今
未見官示棍徒擅入人家乃命禁訛傳棍徒詐騙二十五
日庚辰忽傳皇太后懿旨遴選中宮尋命選淑女於杭州
內官田成李國輔分路廣選隱匿者鄰人連坐民間大擾
晝夜嫁娶貧富良賤妍媸老少俱參錯合城若狂

歿日往浙內臣

田成野史亦云田壯國

明賜北都死節諸臣諡立旌忠廟

正祀文臣二十人范景文贈太傅諡文貞倪元璐贈太保
諡文止李邦華贈太保諡忠文王家彥贈太子少保諡忠
端孟兆祥贈刑部尚書諡忠貞施邦曜贈左都御史諡忠

介凌義渠贈刑部尙書諡忠清吳麟徵贈兵部右侍郎諡忠節周鳳翔贈禮部左侍郎諡文節馬世奇贈禮部右侍郎諡文忠劉理順贈詹事諡文正汪偉贈少詹事諡文烈申佳允贈太僕寺少卿諡節愍吳甘來贈太常寺卿諡忠節陸良謨贈太僕寺少卿諡恭愍陳純德贈太僕寺少卿諡恭節王章贈大理寺卿諡忠烈許直贈太僕寺卿諡忠節成德贈大理寺卿諡忠毅金鉉贈太僕寺少卿諡忠節兆祥子孟章明贈河南道監察御史諡節愍勲戚則張應臻諡忠武鞏永固諡貞愍劉文炳諡忠壯劉文燿諡忠果內臣則王承恩諡忠愍疆臣則衛景瑗贈兵部尙書諡忠毅朱之馮贈右都御史諡忠壯周遇吉贈太保諡忠武其

諸臣家之殉難婦女建坊旌表生員許琰贈翰林院五經

博士

按曰許琰字玉仲吳縣諸生聞北都陷祭告先祠喪家募士誓殺賊五月五日友出蒲酒觴之琰攜於地

拂衣竟去與諸生哭臨文廟御史某者鼓吹呵殿吉服人

琰突前號其帶叱責之御史慚謝罪去投綬者再以救不

死出投胥門江適路王泊舟江干遣人馳救召問故泣對

曰君仇不可不報京師不可不復逆寇不可不誅臣子不

可不死吾非惡生也將以愧今之食其祿而不能死其難

者王太義之適友人至強按之歸家人固守之伺間不得

宛轉哀號絕粒月餘死鄉人私諡曰潛忠先生會弔者數

千人至是進士王曰俞以褒贈請贈翰林院五經博士從

祀旌忠祠詳南畧布衣湯文瓊贈中書舍人立廟於雞鳴山賜額

旌忠其不當從祀而濫與者烈戚則李國楨朱純臣以下

十六人內臣則李鳳翔王之心以下六人皆黜臣內璫之

私人也其姓名無足詳焉

明改前大學士王應熊爲兵部尙書總督川廣雲貴軍務賜

尙方劍便宜行事

應熊字非熊巴縣人萬厯癸巳進士厯官大學士甲申三
月前事詳紀傳時以張獻忠殘破四川故有是命

癸未明封總兵鄭芝龍爲南安伯

芝龍字飛皇

攷曰亦作黃

小字一官福建南安縣石井人也世

爲府掾七歲戲拋石中知府蔡善繼冠擒訊之奇其貌而
釋之長有膂力蕩逸不喜讀附海舶至日本有倭婦翁氏
悅一官遂聘焉卽延平王成功母也海澄人顏思齊者亡
命日本與其黨二十八人出沒臺灣金廈之間思齊死衆
禱諸天擲碗得聖筮而碗不破者立爲主帥一官三擲而
碗不破遂以爲主改名芝龍天啓六年三月犯金門廈門

四月犯廣東之靖海甲子地方當事者以蔡善繼有拋石不責之恩擢爲泉州巡海道芝龍詣泉州降而巡撫朱欽相第令繳船隻軍器候安插芝虎說龍曰此欲散我黨羽翼乃揚帆去崇禎元年犯閩之銅山敗都司洪先春犯金門獲游擊盧毓英芝龍縱之還且曰朝廷苟一爵相加東南可高枕矣都督俞咨皋大猷之子也檄千戶馬勝百戶楊世爵勦之鎮海衛敗死乃大調兵船會勦或議避之粵東芝龍曰咨皋膏粱統袴徒讀父書何足懼哉大破之浯嶼咨皋遁入廈門給事中顏繼祖糾之咨皋褫職於是芝龍縱橫沿海當事者莫敢問焉秋七月巡撫熊文燦從泉州知府王猷之請遣盧毓英招之芝龍降重賂當道指紳

惟少詹林鈞不見其使反其牘背署之曰人有向善之心而不與人爲善者非也與人爲善而又因以爲利者亦非

也遂以義士鄭芝龍收鄭一官題奏委爲海防游擊

疏曰詳江

東旭臺灣外紀又南畧載鄭芝龍小傳云芝龍年十八以戲父妾串覺逃之洋舶芝龍固姣好羣商悅之卻延平王成功母也島主宴飲歌舞島主有新寡女悅之卻延平王成功母也逾年附商船歸中途爲海盜所劫盜發之海盜有十寨寨各有主芝龍之主患痼疾九主爲之宰牲療祭芝龍泣求其主乞祭後會飲爲放一洋衆諾之劫四艘直數十萬於是芝龍之富逾十寨矣其主死芝龍遂主其寨始通家耗番燕杭兩京珍玩興販琉球朝鮮真臘占城諸國掠朝惠庫福汀漳台紹之間南畧謂芝龍族姪塔翁某所述宜可憑信然謂芝龍爲漳州府人已屬大謬又其間情事多影記之詳慎遠矣積官至都督同知劉香老之亂按察使曾櫻以百口保芝龍芝龍感激八年乙亥四月芝龍合粵兵擊香老於四尾遠洋香老勢蹙自焚溺死

疏曰南畧云芝龍幼習海情海

盜多故盟自就撫後海船不得鄭氏令庶不能往來每船
例入三千金歲入千萬計自築城於安平海可泊船運達
海其守城兵餉不取於官凡賊
遣人海者概付芝龍取之如寄芝龍既平香老遂以海利
交通朝貴寢以大顯有同官陳謙者嘗與芝龍盟於廣州
南都立謙陳追勦三策部議謂其切時務且與閩帥交善
令齎勅書金帛獎諭芝龍調其兵六千人入衛歸鄭鴻逵
統領比啓勅書乃談書南安爲安南芝龍愕然謙曰安南
則兼兩廣若南安僅一邑耳請留券而易詔芝龍大喜厚
贈而別未復命而南都陷鴻逵芝龍弟也時充總兵官次
芝豹及猶子彩故曰諸書謂以彩爲鴻逵子今以事並爲
水師副將又有芝虎者勇冠三軍以征劉香老歿於海
徐鼎曰特書何爲閩事張本也閩之亡由芝龍降也芝龍

之降出陳謙死也故撫其始事以列於篇

明命停文武官薦舉禁非言官而上疏者

明革楚撫王揚基任聽勘

尋命楊基與李乾德各帶罪往王應熊軍前理餉

明中旨以阮大鍼爲兵部添註右侍郎都察院左都御史劉宗周疏諫不聽

大鍼雖召對月餘而廷臣爭之急故起用之旨不遽下安遠侯柳祚昌與大鍼相比薦大鍼知兵乃命添註兵部右侍郎禁朝臣不得把持阻諫劉宗周疏言當年爭吏垣致魏大中死於詔獄實大鍼主使祖宗故事大僚必廷推迺者中旨屢降司農之後繼以少宰而大鍼又爲司馬其壘

救斜封之漸有不待問者大鉞進退實係江左興亡乞寢
命王不聽尋命大鉞兼僉都御史巡視江防大鉞亦具疏
曰天下事全被黨人斷送今再不堪斷送矣根基初安寇
敵交訐凡我臣工請問寇如何勦敵如何款兵如何招如
何練餉如何足如何運藩鎮如何聯屬寨衆如何撫安君
上之封疆與自己之性命全然置之高閣惟從事於構鬭
之場不亦大夢不醒之甚邪先帝神明英斷原非喪邦之
主而諸臣必欲結黨以朦之猷不獲展謀不克成欲用者
必不得用欲去者必不令去諸臣之黨羽雖成而高皇帝
百戰之乾坤先帝一家之性命已破壞崩而矣把持誤國
之臣究亦不免縊者縊拷者拷斃者斃其喪心從賊狼狽

逃回者天誅不漏名臭身駢回頭猛想其當初苦結黨以孤主勢者自己亦何便饒利益之有哉疏繁不具錄其巧詆文過如此

徐薊曰雲間夏氏續幸存錄曰大鉞誓師江上衣素蟒圍碧玉見者叱爲梨園裝束嗟乎杖鉞麾旄之任卽倡優排演之場國之不亡安可得哉大鉞疏何以錄也孔子曰惡利口之覆邦家惡其言之足聽也其所言乃其所自狀夫我

大清兵擊敗圍賊兵於府谷

是月自成僞總兵李過自新安糾賊三萬犯府谷逼大同大兵擊之殲殪過半李過中創竄歸綏德

小 腹 紀 年 增 攷 卷 第 七

鎮 甯 宋 左 夫 光 伯
泰 順 林 太 冲 鵝
同 里 同 定 曹 宗 音
同 里 受 業 汪 達 利
參 校